

劇 本

《點解你咁毒》

編劇 錢德順
白攬 崔桂琼

故事大綱

阿松、小肥、尼露和阿丁四人，在生活上各自遇上不開心的事情。為了讓自己可以開心一些，他們便來到了「開心地」。在那兒，他們遇上了一隻在街上通處跳的大蛤蟆，大蛤蟆同情他們的遭遇，決心幫助他們，牠找來了一班叫人開心的好朋友，很快，阿松、小肥、尼露和阿丁四人都嘗到開心的滋味……

劇本

(手拿着書的松、有小小肥的小肥、失戀的尼露、坐在一角的丁。四人來到這塊開心地。)

1. 眾人

(唱) 這處名為「開心地」，可使你日夜笑嘻嘻
拋棄愁煩多快樂，我哋大家歡聚真有趣

(白) 我成日都係冇心機，屋企嘅爸媽好煩氣
學校老師又猙獰，同學說三兼道四

(唱) 嘻哈……周身冤屈氣，到開心世界真歡喜，功課拋下笑嘻嘻
歡笑樂園開心地，開心到日夜笑嘻嘻
不皺眉頭歡笑面，我哋大家歡聚真有趣

(白) 阿 sir Miss 好長氣，郁啲又罰企
日日講人自講，簡直係想煩死你

(唱) 歡笑樂園開心地，開心直落到腳趾尾
喜上眉頭多快樂，我哋闔家歡樂真有趣

2. 旁白

(數白欖) 氹氹轉，走進花園，見人堆，一團團，發現一班細佬好端端，講東講西雞「啄」唔斷，大家細聽唔好氣喘！唔好氣喘！

3. 松

你係……

4. 小肥

我係小肥。

5. 尼露

你真係有小小肥。

6. 小肥

你做乜笑我啊！

7. 松

我有呀。

8. 小肥

你有！你個書蟲，你做乜笑人！

9. 松

我叫阿松，松樹個松，唔係書蟲。

10. 尼露

你做乜坐埋一邊呀？

11. 松

(向丁) 呢道係邊道嚟架？

12. 小肥

嗰日，我好唔開心，行吓行吓，見到有個「開心地」嘅路牌，我哋住行，行吓行吓，就嚟咗呢道喇。

13. 旁白

(數白欖) 做人做事唔順利，壓力頻生無人理，不如收埋了自己，另闢一塊開心地。唔順利，無人理，收埋自己，真係可以走進開心地？

14. 尼露

噫！我都係呀！

15. 松

我都係呀！

16. 尼露 世界上原來仲有你哋唔開心。
17. 小肥 書蟲，你成日揸住本書，就梗係唔開心啦。根據我向身邊同學調查，十個同學十個都鐘意學校旅行、聖誕聯歡、陸運會。
18. 尼露 仲會因為打風同豬流感停課而慶祝！
19. 小肥 即係話，讀書考試係學校生活「最不受歡迎」嘅項目。
20. 尼露 你成日揸住本書，自尋煩惱。
21. 松 你估我想成日揸住本書咩，但係又有乜辦法啫，你睇吓我屋企。
- (松家的插敘。)
22. 松爸 阿松。
23. 松 爸爸。
24. 松爸 上次數學測驗，成績點呀。
25. 松 合格……
26. 松媽 六十分咋。
27. 松爸 吓？六十分？做乜咁低分架？
28. 松 我盡咗力架喇。
29. 松爸 盡咗擲六十分嘅力呀？
30. 松媽 升咗上小六之後，啲分數都未試過有八十分。
31. 松爸 平時見你上網打機就盡力。
32. 松媽 下個星期又數學測驗喇，仲晚晚上網。
33. 松 上網做 project 咋。
34. 松爸 做 project 要同人 skype 咩？你部 NDS 呢，畀我！
35. 松 做乜呀？
36. 松爸 我保管，等你下次數學測驗有八十分先畀番你！宜家即刻讀書！
(松爸、松媽離去。松家的插敘完。)
- (回到開心地。)
37. 尼露 講落你又真係幾慘嘅，不過，我阿爸阿媽都係嗰架。
38. 小肥 我阿爸阿媽都係呀。
39. 松 你哋都係因為嗰就嚟到呢塊開心地。
40. 肥/露 唔係！
41. 小肥 見你同我表白，噉我都同你表白啦，不過，你唔准同人講架。
42. 尼露 係嗰嘅情況下，通常我哋都會話：
43. 松/露 「信我啦，我唔會同人講嘅！」
44. 小肥 阿松，其實你面對嘅唔開心，好濕碎咋。你睇吓我……
- (小肥學校的插敘。)
45. 同學甲 噉，小肥，新衫嚟。
46. 同學乙 係嚟，好型嚟。
47. 同學甲 大碼？乜你著大碼架？
48. 小肥 (尷尬地) 一樣價錢，大件啲，抵啲嘛。
49. 同學乙 你好似又肥咗呀！
50. 小肥 係咩？
51. 同學甲 係嚟，隻手臂粗咗。
52. 同學乙 我借個磅你丫，新買架，好準架。(把小肥放到磅上，小肥忙跳開。)
53. 同學甲 好彩你係真實世界咋，如果上電視，特別係 16 比 9 個啲，睇落會更

- 加肥。
54. 同學乙 係呀，啲電視明星個個都好瘦，瘦過你好多架！
55. 同學甲 快啲減肥呀！如果唔係，會由小肥變中肥……
56. 同學乙 跟住變大肥。
57. 同學甲 啲人好過份架，佢會同你起花名，叫你做「豬扒」。
58. 同學乙 有啲仲衰，叫你做「雜扒」。
59. 小肥 你哋講夠未呀！
(同學甲、乙離去。小肥學校的插敘完。)
- (回到開心地)
60. 尼露 小肥，你班朋友真係過分呀！
61. 小肥 以後唔好喺我面前提起個「肥」字！
62. 松 好，要講「唉，又唔合格」，唔好講「唉，又『肥』咗」。
63. 尼露 要講「出街食飯啲餸好多油」，唔好講「啲餸好『肥』」。
64. 小肥 夠喇。我要減……咗啲多餘脂肪。
65. 松 噉先至有異性鐘意你。
66. 尼露 (激動) 邊係丫！一個人要變心，你有冇脂肪，佢都會變心。
67. 小肥 尼露，你做乜咁激動呀？
68. 尼露 我憎死佢！
- (尼露在街上的插敘。)
- (尼露打電話。)
69. 尼露 Chris，我係尼露呀，做乜呢幾朝都唔同我一齊返學啫……啊，明白，明白，不如，今日一齊 lunch 丫……吓唔得……噉，聽日 lunch 丫……噉後日丫……
(Chris 與第三者出現，尼露發現。)
70. 第三者 做乜一早就有人打電話畀你嘅？
71. Chris 尼露囉，佢好煩呀，問長問短。
72. 第三者 咪直接話畀佢知，你同咗我一齊……返學，一齊食早餐，一齊 lunch，一齊放學。
73. Chris 廢事 hurt 佢啦，佢已經感情脆弱，加上有咗我呢個咁好條件嘅戀愛對象，我怕佢一時間承受唔起呢個咁大嘅打擊呀。
(尼露出現。)
74. 尼露 (激動) Chris，你……你一腳踏兩船！
75. 第三者 佢冇！你已經唔係佢條船！……(省起，更正) 應該係，你一直都唔係佢條船，(省起，補充) 你泊錯碼頭咋。
76. 尼露 第三者，收聲！
77. 第三者 講得好，(指着尼露) 第三者，收聲！
(課堂鐘聲響起。)
78. 第三者 好喇，要入學校啦，如果唔係就會畀風紀捉遲到喇。
79. 尼露 咪走住，今日唔講清楚，邊個都唔走得。Chris，你講，點解要佢唔要我？
80. 第三者 你想知道點解？返屋企問吓你阿媽！問佢點解「生得你咁樣衰」。
81. Chris 尼露，再見。
(Chris 與三者離去。尼露在街上的插敘完)

- (回到開心地。)
82. 尼露 你哋睇到啦，我失戀呀！世界上所有嘅痛苦，都苦唔過失戀。
83. 小肥 仲係「畀人飛」嗰隻。
84. 松 由發現第三者，變成為第三者。唉。不過求學時期本來就唔應該拍拖，你擺苦嚟辛。
85. 小肥 同意！
86. 尼露 (激動，向小肥還以顏色) 如果你拍拖……你隨時會因為體形而變為第三者，隨時會受到……(強調) 「雙重打擊」，到時你就知道失戀嘅滋味。(向丁) 你話係咪。
- (丁沒有反應。)
87. 尼露 喂，你係咪有病呀，你坐喺度好耐囉嚟！
88. 松 睇你個樣，都好似好唔開心嚟。
89. 小肥 同是天涯淪落人，我哋都咁坦白，你都應該坦白啲丫。
90. 尼露 你乜名呀？
91. 丁 我叫……阿丁。
92. 肥/松 阿……丁……！
93. 松 你係咪畀人蝦呀？
94. 丁 (很激動) 冇！冇人蝦到我！
95. 小肥 (向觀眾) 噉即係有啦！
96. 丁 (手握拳頭，更加激動) 邊個蝦我我就打邊個！
97. 尼露 (向觀眾) 仲蝦得好過份添。
98. 松 應該係畀全班同學排斥。
99. 丁 (仍激動) 唔係全班同學排斥我，係我排斥全班同學！
- (阿丁在學校小食部的插敘。)
100. 同學 A 嫦姐，我哋約咗阿丁喺籃球場食 lunch，宜家走咗嚟小食部……
101. 嫦 乜我有約過阿丁喺籃球場咩？
102. 同學 B 嫦姐有分數啦，你咁鍾意去籃球場，自己去丫。
- (丁出現。)
103. 丁 原來你哋喺度啊？
104. 嫦 點呀，丁仔。
105. 丁 你哋有冇搞錯呀？約咗我喺籃球場，自己就嚟咗小食部。
106. 嫦 我哋頭先都有去籃球場架，係嘛？
107. 同學 B (力撐) 係丫！
108. 同學 A (害怕) 係……係……
109. 丁 你講大話！頭先我喺籃球場企咗半個鐘，你哋知唔知幾晒呀？
110. 同學 B 幾晒呀？
111. 丁 晒到命都有呀！
112. 嫦 咪好囉，難得機會等你晒吓命！
113. 同學 B 仲唔過嚟多謝嫦姐？
- (丁欲過來找晦氣。)
114. 嫦 (指着丁) 咪過嚟呀？
115. 丁 你玩人玩得咁過分？
116. 嫦 好臭呀！
117. 同學 B 頭先上數學堂撩鼻屎。
118. 丁 我幾時有呀？

119. 同學 B (向同學 A) 係佢話親眼見到架！
120. 同學 A (猶疑) ……係呀！好污糟……好核突……
121. 嫦 大陸仔，左邊污糟，右邊核突。
122. 同學 B A 至 Z 識串未呀？
123. 丁 串咩呀？
124. 同學 B 串你囉，串唔起呀？
125. 嫦 想埋我哋堆，慳啲啦！
126. 丁 我有乜嘢得罪你哋呀？
127. 嫦 冇，不過睇你唔順眼！我哋每級都有幾個列為首選排斥對象，你好榮幸係其中一個，你認命啦！
128. 同學 B 你唔使旨意係學校有 friend 架喇。邊個同你 friend，就即係同嫦姐過唔去！(向同學 A) 我講得啱唔啱啊？
129. 同學 A ……當然啱，嫦姐講乜都啱。
(嫦、同學 A、同學 B 離去。阿丁在學校小食部的插敘完。)
- (回到開心地。)
130. 松 睇嚟阿丁嘅情況好惡劣。
131. 小肥 唔惡劣都唔會嚟開心地尋開心啦。
132. 丁 我都習慣咗唔開心。
- (Dudu 和 Lulu 出。)
133. Dudu/Lulu 各位同學，大家好。
134. Dudu 我係 Dudu。
135. Lulu 我係 Lulu。
136. Dudu 我哋係呢次活動嘅主持人。Lulu 啊，可能我哋喺學校都會遇到頭先劇中人阿松、小肥、尼露、阿丁嘅唔開心嘅情況。可能我哋係唔開心嗰個……
137. Lulu 又或者係令到人唔開心嗰個……
138. Dudu 又或者係旁觀者。
139. Lulu 唔知現場嘅同學，又有冇遇到自己或者身邊嘅同學，有唔開心嘅情況呢？如果遇到唔開心嘅情況，你哋又會點做呢？
140. Dudu 不如同學同身邊嘅人傾吓呢兩個問題，一陣我哋請幾位同學分享一下，好唔好呀？
141. Lulu 好丫。宜家就請同學討論兩個問題：第一，你哋自己或者身邊嘅同學，曾經遇到啲乜嘢唔開心嘅情況呢？第二，如果遇到唔開心嘅情況，你哋又會點做呢？
142. 旁白 (數白攬) 唔開心，有煩惱，困難嚟到有得 say no，凡人就係多煩惱，唔開心，嘴 OO，合力解難盡心吐。
- (稍後。)
143. Dudu 好，我哋宜家就請同學分享一下。有冇同學自願分享一下呢？
- (同學分享後。)
144. Lulu 好多謝頭先分享嘅同學。
145. Dudu 丫，劇中人物阿松、小肥、尼露、阿丁唔開心，佢哋又有乜嘢辦法解決呢？

146. Lulu 佢哋嘅辦法係，嚟到呢塊「開心地」。
147. Dudu 有用咩？
148. Lulu 唔知呀。……Dudu 啊，(指着台上松等四人) 唔知佢哋四個點解會嚟到呢塊「開心地」呢？
149. Dudu 我諗大家都想知道！喂，四位。
150. 小肥 乜事呀？
151. Dudu 係乜嘢吸引你哋嚟呢道嘅？
152. 四人 係好奇心。
153. Dudu 你哋唔怕呢度有危險咩？
154. 松 老師話，學生最緊要係有好奇心，對未知嘅事情，要有興趣發掘真相。
155. Dudu 但係你哋嘅好奇心，都要放喺合適嘅事情上面。
156. 尼露 老師話，好多科學嘅發現，都係因為科學家充滿咗好奇心！
157. Lulu 對壞事好奇，後果會好嚴重。
158. 丁 試都未試過又點知係壞事呢？
159. Dudu 根據大量嘅研究，青少年濫藥，其中一個最主要嘅原因就係「好奇」！
160. 小肥 你講咗去邊呀，我哋幾時有濫藥呀？
161. 松 邊有咁多藥畀我哋去濫丫。
162. 尼露 就算真係有藥，我哋都唔會去濫！
163. Lulu 你哋都係快啲離開呢度啦！毒品嘅魔力非同小可，你哋唔好高估自己呀！
164. 丁 係你低估我哋咋。
165. 尼露 你哋好煩呀！
166. Dudu 邊有咁大隻蛤乸隨街跳丫？
(有數隻很大的蛤乸出現，眾人都嚇了一跳。Dudu 和 Lulu 搖頭離去。)
167. 尼露 真係有咁大隻蛤乸隨街跳，我哋有冇睇錯？
168. 蛤乸們 (唱，調用<青蛙媽媽睡醒了>)
沿路你聽到蛤乸叫，咯……叫……
沿着這街中你可見，巨大蛤乸跳！
相信這一切！全是真的！未有花假！
169. 尼露 嘩！真係有咁大隻蛤乸隨街跳架？我有冇睇錯呀？
170. 旁白 (數白攬) 蛤乸，蛤乸，隨街跳，一隻一隻大聲叫，亂叫亂跳伸手招，引你入局嘴翹翹。
171. 蛤乸 一啲都有錯，我就係人人喺街上面都想見到嘅「大蛤乸」。你哋正處身係開心地，喺「開心地」裏面，大家都可以「開開心心地」過生活，仲有，你哋可以見到好大隻蛤乸通街跳。
172. 松 我想開心啲。
173. 蛤乸 阿松，你可唔可以野心大一啲，你唔應該只係要開心啲啲，而係要做全世界最開心嘅人。
174. 小肥 我都得？
175. 蛤乸 唔單止你都得，仲有你、你、你……個個都得！
176. 丁 真係？好嘢！
177. Lulu 你哋千祈唔好信佢呀？
178. 蛤乸 你哋想唔想開心啲？
179. 眾人 想呀！
180. 蛤乸 想就將佢哋推落台！

- (眾人把 Lulu 和 Dudu 捉着！Lulu 和 Dudu 大叫掙扎着！)
181. 眾人 一、二、三！
(眾人把 Lulu 和 Dudu 推下台！Lulu 和 Dudu 大叫聲中被推下台！)
182. 眾人 我哋想開心啲呀！
183. 小肥 咪住，收幾多服務費先？
184. 松 警訊都有話，不法之徒，提供服務呃錢。
185. 蛤乸 試用期內，費用全免。
186. 小肥 免費，邊有咁大隻蛤乸隨街跳架？
(大蛤乸顯示自己身鍛。)
187. 尼露 就好似大公司試食，都係免費架！
188. 蛤乸 聰明！你哋都係各有各唔開心，應該同病相憐，然後互相影響，你影響吓我，我影響吓你，噉大家先可以開開心心噉過生活架。專家都講，朋友，對你哋呢個年紀嘅人嚟講，係最重要架！
189. 丁 係呀！
190. 蛤乸 兄弟姊妹，出嚟。
(開心地五物出來，分別為藍精靈、冰冰、K 仔、搖頭、和大麻繩。)
191. 旁白 (數白攬) 藍精靈，冰冰，K 仔，搖頭丸，各有特色，引人入勝
表面風光，裡頭古惑，除非唔掂我！掂親你就死囉！
唔信？唔信？唔係嚇你，睇下佢地係咪真係開心啫？
- (松遇上藍精靈。)
192. 丸仔 阿松，讀書壓力大，係香港社會嘅畸型產物，你都聽聞外國嘅少年人係有讀書壓力架，你睇，你晚晚讀書，咁辛苦……放低本書，同我藍精靈一齊，世界更美麗。你睇吓……(按下手中的遙控器。)
- (松的迷幻世界。)
193. 松媽 哈哈，松仔，你喺度做乜嘢呀？
194. 松 哈哈，媽，我讀書呀！
195. 松爸 哈哈，松仔，你真係想做書蟲咩！搵晒啲書，去玩啦！
196. 松 哈哈，老竇，去邊道玩呀！
197. 松爸 哈哈，去……天上面玩，我哋飛。
198. 松 好呀！飛呀！
199. 松媽 係呀，松仔，你有毛有翼，識飛啦！
200. 松爸 (唱) 啊……我要飛往天上……啊……像那天鳥翱翔
201. 松 嘩，老竇，我跌落去喇！
202. 松媽 係呀，松仔，跌落去呀，好刺激呀！
203. 松爸 嘩，好多星星啊！
204. 松 (唱) 一閃一閃小星星，一顆一顆亮晶晶
高高掛在天空上，伴著月兒放光明
一閃一閃小星星，一顆一顆亮晶晶
205. 蛤乸 (按下手中的遙控器) Next！
(松爸和松媽離去，松定格。)
- (小肥遇上冰。)
206. 冰 小肥，你想減肥，係啱嘅。
207. 小肥 你係……

208. 冰 人靚聲甜……又稱冰冰嘅……
209. 小肥 冰冰！范冰冰！國內好紅個嚟。
210. 冰 多謝，叫我阿冰！有人以為你減肥係為咗貪靚，其實係屈你！你真正減肥嘅原因，係為咗健康！追求健康瘦身，主要係靠留意自己嘅身高同體重嘅比例！
211. 小肥 比例？
212. 冰 你？……唔怕同你講，你嘅比例，跟本就不成比例！
213. 小肥 我已經減緊肥。
214. 冰 方法呢？
215. 小肥 我試過同試緊好多種方法，蔬果減肥法、高纖低脂、帶氧運動、音樂治療、最近我試緊 Hip-pop 減肥法！
216. 冰 全部都不得其法！想唔想好似我咁靚丫？
217. 小肥 想呀！

(小肥的迷幻世界。)

(香港小姐音樂，小肥出。)

218. 畫外音 本年度沙田區校花係……二號，小肥！
219. 小肥 我係最 fit！我係最 heat！
220. 同學甲 小肥，你好型呀！
221. 同學乙 好勁呀！
222. 小肥 我宜家情緒高漲，精力充沛，仲充滿信心。
223. 同學甲 趕走多餘脂肪。
224. 同學乙 拜拜全身肥肉。
225. 同學甲 手臂夠瘦。
226. 同學乙 條腰夠幼。
227. 同學甲 冇甲組腳。
228. 同學乙 熱褲可以隨便著。
(舉起手掌。)
229. 小肥 大家睇到未。
230. 同學甲 手掌？
231. 小肥 冇錯，係「首長」，係香港特區首長！
232. 甲/乙 小肥特首，Cheer！
233. 蛤乸 (按下手中的遙控器) Next！
(同學甲、乙離去，小肥定格。)

(尼露遇上搖頭。)

234. 搖頭 尼露，我做乜搖頭？因為我戩你唔抵。我要 Chris 返嚟你身邊，要 Chris 同你 say sorry！好唔好！
235. 尼露 好！
236. 蛤乸 (按下手中的遙控器) 尼露，你睇！

(尼露的迷幻世界。)

(尼露隨音樂起舞，Chris 入。)

237. Chris 尼露，你跳舞跳得好好呀！
238. 尼露 冇錯，我係舞后！
239. Chris 你係舞后……哈哈 (Chris 以清朝官員的禮儀) 參見舞后。

240. 尼露 哈哈，(停了跳舞，頭在搖，身在抖) 你嚟搵舞后做乜呀。
241. Chris 舞后，兒臣已經放棄咗第三者，求你畀個機會我返返嚟你身邊。
242. 尼露 (仍不斷搖頭) 你哋人嘅。
243. Chris 我唔敢再哋你喇，你答應我啦。
(尼露仍不斷搖頭。)
244. 第三者 尼露，你係咪真係要同我爭阿 Chris。
(尼露搖頭，Chris 和第三者不明。)
245. 第三者 你放棄阿 Chris？
(尼露搖頭。)
246. 第三者 你唔放棄阿 Chris！
(尼露搖頭。)
247. 第三者 你乜都搖頭，你擺明係玩我！
(尼露搖頭，全身抖震。)
248. 第三者 你尊重吓我，企定定同我講嘢得唔得呀！
(尼露搖頭，全身抖震。)
249. 尼露 跳舞，大家一齊跳！Music。
250. Chris 好，我陪你跳！
251. 第三者 你痴線架！
(尼露及第三者離去，Chris 定格。)
- (丁遇上 K 仔。)
252. K 仔 大佬！
253. 丁 你……你叫我做……
254. K 仔 大佬，你係我大佬丫嘛。你畀我跟你丫！跟住你好威呀！
255. 丁 你……
256. K 仔 我知我個樣畸畸咁，阿媽生我生得畸畸咁，所以大家就叫我做 K 仔！
不過我唔介意，因為我 K 仔今日終於搵到我大佬。
257. 丁 好，我就做你大佬。
258. 蛤乸 (按下手中的遙控器) Next！
- (丁的迷幻世界。)
- (Chris 入。)
- (嫦姐，同學 A，同學 B 出。)
259. 嫦 喂，阿丁，我唔係叫咗你唔准喺我面前出現咩？
260. 同學 B 快啲自動消失！
261. 丁 你哋收聲呀，邊個再嘈我就打邊個。
262. 同學 A 嫦姐，阿丁做乜呀？
263. 丁 做乜關你哋乜事呀！
264. 同學 B 嫦姐，佢好似有啲料到嚟。
265. 丁 趁我丁爺未發火之前，好自動消失，如果唔係，咪怪我唔客氣呀！
266. 同學 B 嫦姐，佢好串嚟。
267. 嫦 你過去睇吓佢乜料。
268. 同學 B 我？(向 A) 喂，聽到未呀，過去睇吓佢乜料。
269. 同學 A 我？
270. 丁 (大叫) 呀！
(嫦、同學 A、B 害怕，後退。)

271. 丁 老虎唔發威就當病貓？
 272. 嫦 君子不吃眼前虧。走！
 273. 丁 (再大叫) 呀！
 (嫦、同學 A、B 落慌而逃。)
274. 丁 (精神有問題) 哈哈……
 (丁定格。)
- (大蛤蟆出，松、小肥、尼露、和阿丁離開定格，走到大蛤蟆前多謝牠。)
275. 松 枉我讀咗咁多書，今日先知道有開心地。
 276. 小肥 仲有大蛤蟆隨街跳。
 277. 尼露 呢道有真正嘅快樂，又有真正嘅愛情。
 278. 丁 搵返我真正嘅身份地位。
 279. 蛤蟆 開心地好大，為咗等你哋唔好迷路，我宜家用大麻繩幫吓你哋，佢會係你哋嘅開心地嘅導遊。
 (大麻繩踏上。)
280. 大麻繩 各位，一見我咁醒，就知我係大麻繩。請大家伸出右手……
 281. 旁白 (數白攬) 大麻，大麻，好鬼醒！有機會就嚟向你請請！
 (大麻繩綁着他們的右手。)
282. 丁 你做乜綁住我哋呀？
 283. 尼露 我哋咁有緣，綁埋一齊咪仲好！
 284. 蛤蟆 好喇，大家喺「開心地」開開心心地玩吓先，我哋仲有好多人要招呼。陣間見。
 (大蛤蟆和五怪離去。)
 (開心地留下松、小肥、尼露和阿丁四人、並四人「自己的定格」。)
285. 尼露 (望着定格) 佢哋做乜定住嘅？
 286. 小肥 好似睇 DVD 嗰陣，撇咗「暫停」嗰個掣。
 287. 松 (拾起一個遙控) 係咪呢個呀？
 288. 丁 噫，蛤蟆唔記得擺個遙控器嚟。
 289. 松 放嚟睇吓。
 290. 眾人 好呀！
 291. 松 我搵到個遙控器，我睇先！
 (松以遙控指向自己定格，按掣。)
- (松的未來。)
292. 未來的松 (唱) 一閃一閃小星星，一個一個亮晶晶。
 (指着前面) 媽，點解啲星向上飛嘅？
 (松爸、松媽仍在笑。松跌在地上。)
293. 未來的松 (按着左腳) 啊！好痛啊！媽！爸爸！你哋喺邊啊？
 294. 松 我由一樓跌咗落街呀！隻左腳斷咗呀！
 (松爸、松媽仍在笑。松躺在地上。)
295. 未來的松 啊！有兩粒星星嚟緊呀！
 296. 松 睇車呀！走呀，駕車撞緊埋嚟呀！
 (撞車聲。)
297. 未來的松 (按着右腳) 呀！我隻右腳呀！

298. 松 兩隻腳都斷咗！
(救護車警號，兩白衣救護員出，用擔架把未來的松抬走。)
- (小肥的未來。)
(小肥的定格動起來。)
299. 同學甲 校花，你做乜成日搵背脊啫？
300. 未來的小肥 我背脊好痕呀！
301. 同學乙 畀我睇吓！(驚慌) 嘩，好恐怖呀！
302. 未來的小肥 乜事呀？
303. 小肥 (走上前看) 點解我個背脊咁多瘡架？
304. 同學甲 好核突呀，係乜嘢嚟架？
305. 同學乙 係冰瘡呀！食得冰多，會周身生個啲呀？
306. 同學甲 乜食冰都會生啲咁恐怖嘅瘡架？死喇！我日日都食紅豆冰，我死梗喇！
307. 同學乙 你係咪玩低能呀！係安非他命個隻冰呀，毒品呀！
308. 同學甲 吓，小肥吸毒？
309. 小肥 我有，我減肥咋！
310. 未來的小肥 我隻手都有瘡。(細看自己的手) 有蟲啊！有蟲喺我隻手搵出嚟呀！
(用手抓)
311. 同學甲 喂，你唔好抓呀！流血喇！
312. 同學乙 好恐怖呀！
(甲、乙忙逃走。)
(救護車警號，兩白衣救護員出，用擔架把未來的小肥抬走。)
- (尼露的未來。)
(尼露的定格動起來。)
313. Chris 尼露，今日係我哋相識兩星期嘅紀念日子，不如我哋去……
314. 未來的尼露 去跳舞！
315. Chris 跳舞？妳近排日日跳舞，妳唔悶咩？
316. 未來的尼露 悶！因為我悶，所以要跳！
317. Chris 妳跳咗成晚喇！妳唔劫咩？
318. 未來的尼露 (搖頭) 劫！劫到要死！死都要跳！呀！
319. Chris 乜事呀？
320. 未來的尼露 我對手抽筋呀！
321. Chris 我同你按摩吓。
322. 未來的尼露 呀！我對腳抽筋呀！
323. Chris 我同你按摩吓丫！
324. 未來的尼露 呀！我全身都抽筋呀！……Chris，做乜唔按摩呀？
325. Chris 我按唔到喇，我對手都抽埋筋喇！
326. 未來的尼露 水啊……我要飲水呀……
(Chris 離去。)
(救護車警號，兩救護員出，用擔架把未來的尼露抬走。)
- (丁的未來。)
(未來的丁定格動起來。)
327. 丁 (按搖控) 停！(畫面隨即靜止！) 我……我唔睇！

328. 小肥 點解呀？
329. 丁 我唔想睇！
330. 尼露 你睇晒我哋啲衰嘢，就唔畀我哋睇你啲衰嘢？
331. 小肥 好唔公平啫！
332. 丁 我係大佬，我話唔畀你哋睇就唔畀你哋睇！
333. 松 你估你真係大佬呀，人哋見你亂咁嘅，以為你 short 咗，怕咗你咋！
334. 尼露 阿丁，點解你面色咁難睇嘅？
335. 未來的丁 我……
336. 尼露 喂，你呢場係唔准講嘢架！
337. 未來的丁 我……我好急呀？
338. 丁 急乜嘢呀？
339. 未來的丁 急尿呀！
340. 丁 你頭先咪啱啱去過廁所囉。
341. 未來的丁 已經係十五分鐘之前嘅事喇！
342. 松 吓，十五分鐘去一次廁所，一個鐘頭去四五次，你咪要帶住個廁所出街？
343. 未來的丁 你估我唔想呀？
344. 小肥 交通費會好貴嘢……每站都要落車，去完廁所上番車。
(未來丁坐立不安，身體扭作一團)
345. 未來的丁 唔得喇，我要去廁所喇！
(救護車警號，兩工作人員拿擔架出。)
346. 丁 你哋嚟做乜呀？
347. 工作人員 A 執走阿丁囉。
348. 丁 (阻止兩人員)我都有郁過。
349. 工作人員 B 你仲想點郁呀？索埋咁多 K，識郁都變唔識郁啦！
(工作人員稍微接觸未來的丁，未來的丁便倒下！)
350. 工作人員 A 同佢講乜丫，開工啦！
351. 工作人員 B 畀塊布你，抹乾淨啲尿尿！
352. 丁 點解要我抹呀？
353. 工作人員 B 你索 K 索到忍唔到尿，係咪要自己負責抹呀！老師有教你要做一個負責任嘅學生咩？
354. 丁 咪住，點解你啲服飾唔同咗嘅？
355. 工作人員 B 丫，索咗咁多 K 都咁好眼力嘞。頭先著嘅係白衫，抬人上白車。今次著嘅係黑衫，抬人上黑車。
356. 丁 黑車，裝死人個嚟。
357. 工作人員 A 識嘢丫，你索 K 索過龍，死咗！
358. 丁 有可能嘅。
359. 工作人員 B 你去問編劇丫……唔係，去問醫生丫。
360. 工作人員 A 開工。
(兩工作人員用擔架把未來的丁抬走。)
- (開心地餘下松、小肥、尼露、丁四人。)
361. 松 我想返屋企。
362. 小肥 我都係。
363. 尼露 如果畀我再揀，我就唔會入嚟呢道……開心地。
364. 丁 一啲都唔開心。

365. 松 走囉。
366. 小肥 我地畀大麻繩綁住。
367. 旁白 (數白攬) 你地，我地，好鬼醒！搞掂大麻甩條繩！
368. 尼露 解開佢丫。
369. 丁 好實呀！
370. 松 有冇人呀？放我出去丫……一齊哎丫……
371. 尼露 鉸剪呀。
372. 小肥 Dudu！Lulu！
373. 眾人 Dudu！Lulu！
(Dudu 和 Lulu 在觀眾席。)
374. Dudu/Lulu 叫我哋做乜？
375. 松 你做咗觀眾呀？上番嚟丫！
376. Dudu 你哋趕走咗我哋呢個事實，已經冇得番轉頭喇！
377. 尼露 點解我哋嘅結局會咁恐怖嘅？
378. Lulu 你哋吸食毒品囉。
379. 小肥 毒品？我哋吸食乜嘢毒品呀？
380. Dudu 你哋真係烏吓烏吓，不如我哋問吓現場比你哋醒目嘅同學仔啦。
381. Lulu 同學，你可唔可以話畀佢哋聽……
382. Dudu 阿松吸食嘅係乜嘢毒品？
(邀請身邊同學回答。)
383. Dudu 冇錯，阿松濫用嘅係藍精靈，即係含有鎮靜劑嘅「丸仔」，濫用嘅人會覺得好効、成日想瞓、唔開心、迷迷糊糊，所以容易引起意外，被人非禮，或者自己犯咗法都唔知；又可能會急性中毒而停止呼吸，引致昏迷，甚至死亡。
384. Lulu 小肥吸食嘅係乜嘢毒品？佢吸食毒品之後有乜嘢反應？
(邀請身邊同學回答。)
385. Lulu 冇錯，小肥濫用嘅係「冰」，係興奮劑。服食「冰」會令人煩躁不安，失眠、焦慮、抑鬱、有自殺念頭、亦容易引發被迫害的意念。「冰」亦會令心跳加快及不規則、血壓上升、導致腦血管爆裂、中風、昏迷、甚至死亡。
386. Dudu 尼露吸食嘅係乜嘢毒品？佢吸食毒品之後有乜嘢反應？
(邀請同學回答。)
387. Dudu 冇錯，尼露服用嘅係搖頭丸，屬興奮劑。食咗之後，令到佢初時好似有充滿精力嘅感覺，長時間跳舞都唔覺得効，但其實係藥物影響佢嘅手、腳同頸部肌肉失控抽筋。尼露會因運動過度而引致身體過熱、大量出汗，脫水、呼吸心跳加快，筋疲力盡、抽筋，嚴重嘅可以引致死亡。
388. Lulu 阿丁吸嘅係乜嘢毒品？佢吸食毒品之後有乜嘢反應？
(邀請同學回答。)
389. Lulu 冇錯，阿丁服用嘅係「K仔」。K仔，會令人有靈魂出竅的錯覺，對外界的反應遲緩，動作協調困難，泌尿系統受損，有時神智昏迷，導致意外例如跌傷、撞車，容易因意外而死亡。
390. Dudu 丫，唔好唔記得呢條綁着佢哋嘅「大麻」繩。大麻，會引致個人對時間、空間距離感覺混亂或扭曲，影響判斷力，又會引致幻覺，令吸食者無緣無故心驚膽跳，以為被人迫害。
391. 松 吓。

392. 小肥 我哋想返屋企。
393. 尼露 愈快愈好。
394. 丁 同我哋解咗條大麻繩！
395. 旁白 (數白攬) 大麻，大麻，好鬼醒！有機會就嚟向你請請！
396. Lulu 你哋係戲劇裡面嘅人物，我哋唔可以改變你哋嘅命運。
397. 松 咁即係點呀？
398. Dudu 你哋嘅命運，係由全劇開始，一路演到宜家，環環相扣。我哋都幫你唔到。
399. Lulu 要改變你哋嘅命運，除非生命有 Take Two。即係畀你哋重演呢齣戲。
400. 小肥 好啊！
401. 尼露 但係，我成日聽人講，生命冇 Take Two 嚟。
402. 丁 我唔想死，唔想死喺條街道，更加唔想死喺黑箱車入面。
403. Dudu 咁要睇觀眾肯唔肯畀你哋演多次喇。
404. 松等人 求吓各位同學等我哋生命可以有 Take Two ㄚ。
(主持引導觀眾表態。)
405. Dudu 既然各位同學都贊成畀多次機會你哋……
406. Lulu 噉你哋就由頭開始演，即係由你哋遇到唔開心嘅事情開始啦！
407. 丁 又要面對唔開心呀？
408. 小肥 唔使面對得唔得呀？
409. 尼露 只要可以離開呢度，你哋話點就點啦！
410. 松 但係，我哋都唔知應該點架。
411. Dudu 我哋可以叫同學畀吓意見ㄚ。
412. Lulu 大家有乜嘢建議，等佢哋可以解決唔開心嘅事情，又可以遠離毒品呢？
413. Dudu 阿松先ㄚ，阿松面對功課壓力太大，就食藍精靈，你對佢嘅處理方法有乜建議？
(問在場同學。)
414. Lulu 小肥想更加靚，就食冰嚟減肥，你對佢嘅處理方法有乜建議？
(問在場同學。)
415. Dudu 尼露嘅失戀，就食搖頭丸減壓，你對佢嘅處理方法有乜建議？
(問在場同學。)
416. Lulu 阿丁畀人排斥，就索 K，你對佢嘅處理方法有乜建議？
(問在場同學。)
417. Lulu 多謝在場嘅同學，我諗阿松、小肥、尼露同阿丁，對重演自己嘅生命應該有好多新嘅睇法。
418. Dudu 事不宜遲，生命冇 Take Two，去片。

(Take 2 的松在家中。)
419. 松爸 阿松。
420. 松 Take 2 爸爸。
421. 松爸 上次數學測驗，成績點呀。
422. 松 Take 2 合格……

423. 松媽 六十分咋。
424. 松爸 吓？六十分？做乜咁低分架？
425. 松 Take 2 我已經盡咗力喇！
426. 松爸 盡咗擺六十分嘅力呀？
427. 松媽 升咗上小六之後，啲分數都未試過有八十分。
428. 松爸 平時見你上網打機就盡力。
429. 松媽 下個星期又數學測驗喇，仲晚晚上網。
430. 松 上網做 project 咋。
431. 松 CUT!
(所有人定格，松上前把松 Take 2 拉出來)
432. 松 你個 PROJECT 其實上網五分鐘內都做完啦！之後你係道打機咋嘛！
433. 松 Take 2 噉我所講嘅即係事實啦！
434. 松 不過只係事實嘅部分！講事實嘅一部分，係誤導人，即係講大話！
435. 松 Take 2 功課壓力咁大，上吓網都唔係好過分啫！
436. 松 但係你問吓自己丫，你一日上一兩個鐘頭網，有時仲三四個鐘！
437. 松 Take 2 同爸爸媽媽講真話，實畀佢哋鬧死啦！
438. 松 或者唔會呢？不過，我情願畀爸爸媽媽鬧，都好過留喺開心地！
(松把松 Take 2 推回原處續演！)
439. 松 上網做 project 咋……不過，間唔中都有 skype，又去吓 facebook，仲有玩 NDS。
440. 松媽 (媽欲打松仔，但最終不忍) 松仔，你咁坦白，我真係好高興。
441. 松 Take 2 吓，我以為爸爸實鬧我添？
442. 松媽 你咪見你爸爸成日都唔出聲，又或者一出聲就鬧你，佢其實都唔知幾緊張你！
443. 松 Take 2 我畀部 NDS 你保管，等數學測驗擺到八十分先畀番我！
444. 松爸 你有唔識問我啦。
445. 松媽 你爸爸嘅數好勁架！
446. 松 原來可以問爸爸。
447. 松媽 仲可以問媽媽。
448. 松 我屋企人對我咁好，我應該一早就知啦！
449. 松媽 阿仔咁乖，我哋點樣獎勵佢呢？
450. 松爸 數學測驗之後，一齊去帝國酒店食自助餐。
451. 松 Take 2 好呀！
452. 松媽 (發現大麻繩。) 呀，呢條乜嘢嚟架，搽咗佢啦！
453. 旁白 (數白攬) 你地，我地，好鬼醒！搞掂大麻甩條繩！
454. Dudu 阿松嘅問題解決咗喇。
455. Lulu 事不宜遲，小肥生命有 Take Two，去片。

(Take 2 的小肥在學校。)
456. 同學甲 噫，小肥，新衫嚟。
457. 同學乙 係嚟，好型嚟。
458. 同學甲 大碼？乜你著大碼架？
459. 小肥 Take 2 (尷尬地) 一樣價錢，大件啲，抵啲嘛。
460. 同學乙 你好似又肥咗呀！
461. 小肥 Take 2 係咩？
462. 同學甲 係嚟，隻手臂粗咗。

463. 同學乙 我借個磅你丫，新買架，好準架。(把小肥放到磅上，小肥忙跳開。)
464. 小肥 停呀!
(所有人定格，小肥上前把小肥 Take 2 拉出來)
465. 小肥 要同佢哋講，話你語鍾意佢哋話你肥! 話你好唔開心!
466. 小肥 Take 2 唔好呀! 佢哋會笑我笑得仲犀利呀!
467. 小肥 其實我真係好怕畀班同學笑，尤其是班男仔，把口好衰架! 但係佢兩個係我好朋友嘛!
468. 小肥 Take 2 鬼同佢哋好朋友呀!
469. 小肥 好朋友就會聽我講嘢，尊重我! 我要同佢哋講清楚，佢哋再笑我，就即係唔當我係好朋友，噉就算啦!
(小肥把小肥 Take 2 推回原處續演!)
470. 小肥 其實，我係肥啲小小，所以我好唔開心。
471. 同學乙 對唔住呀，我唔知你介意架!
472. 同學甲 好多老師都叫你肥仔，我以為你有所謂，咪跟住叫囉。
473. 同學乙 知道你唔鐘意，我哋以後叫返你個名啦。
474. 小肥 Take 2 噉又唔使，由細到大，人人都叫我做小肥，叫真名，我會唔習慣添。
475. 同學甲 老師叫你肥仔，有歧視成分，我同你去搵警察，告佢。
476. 同學乙 講開又講，你其實只係肥啲小小，我覺得你幾好睇，幾健康!
477. 同學甲 係呀，啲老師叫你肥仔，其實好偏心你，好錫你，就係因為你有小小肥。
478. 小肥 原來我係咁受老師歡迎架?
479. 同學乙 我好羨慕你架。
480. 同學甲 我好妒忌你架。
481. 同學乙 我近來猛食嘢，都希望自己變肥仔，等多啲老師錫!
482. 小肥 Take 2 有唔開心，可以坦白同老師同學講，減低一下心入面嘅壓力!
483. 小肥 我明白喇! 唔一定要為咗其他人嘅眼光而增肥或者減肥! 有人欣賞係好事，不過自己識得接納自己就更加重要，其實高矮肥瘦人人唔同，只要身體健康就滿意喇!
484. 小肥 Take 2 班同學對我都幾好丫。
485. 同學甲 (發現大麻繩。)呀，呢條乜嘢嚟架，搵咗佢啦!
(小肥發現大麻繩鬆脫了。)
486. 旁白 (數白攬) 你地，我地，好鬼醒! 搞掂大麻甩條繩!
487. 小肥 呀，條繩鬆咗喇!
488. Dudu 小肥嘅問題解決咗喇。
489. Lulu 尼露生命有 Take Two，去片。
(尼露 Take 2 街上打電話。)
490. 尼露 Take 2 Chris，我係尼露呀，做乜呢幾朝都唔同我一齊返學啫……啊，明白，明白，不如，今日一齊 lunch 丫……吓唔得……噉，聽日 lunch 丫……噉後日丫……
(Chris 與第三者出現，尼露發現。)
491. 三者 做乜一早就有人打電話畀你嘅?
492. Chris 尼露囉，佢好煩呀，問長問短。
493. 三者 咪直接話畀佢知，你同咗我一齊……
(尼露出現。)
494. 尼露 Take 2 (激動) Chris，你……你一腳踏兩船!

495. 三者 佢冇！你已經唔係佢條船！
496. 尼露 Take 2 第三者，收聲！
497. 第三者 講得好，(指着尼露) 第三者，收聲！
(課堂鐘聲響起。)
498. 第三者 好喇，要入學校啦。
499. 尼露 Take 2 咪走住，今日唔講清楚，邊個都唔走得。
(拉尼露出來)
500. 尼露 咪由得佢走啦！
501. 尼露 Take 2 你就梗係噉講啦！又唔係妳畀人飛！又唔係你男朋友走咗！
502. 尼露 你其實係咪真係鍾意阿 CHRIS？
503. 尼露 Take 2 你咩嘢意思呀？
504. 尼露 你拍拖，本來係想感受一吓親密嘅感覺，拍咗拖之後，其實唔開心多過開心，阿 CHRIS 又小器，你同其他男仔傾多兩句佢都會黷你成日，又成日發你脾氣！
505. 尼露 Take 2 有一個男仔鍾意我，都係好事呀！
506. 尼露 所以你怕妳畀阿 CHRIS 飛咗件事傳出去，就好冇面！
507. 尼露 Take 2 ……咪由得佢哋笑囉！
508. 尼露 你同阿 CHRIS 拍拖仲多人笑呀！個個都話，點解你噉叻女，要同個噉嘅 CHRIS 一齊呀！成績又渣過你！操行又差過你！脾氣又臭過你！最嚴重嘅係連身高都矮過你！
509. 社工 尼露
510. 尼露 Take 2 社工？
511. 社工 拍拖唔係秤人，秤吓人哋叻唔叻得過自己先去拍。不過，求學時期唔應該拍拖雖然係老生常談，但係有佢一定嘅道理！
512. 尼露 Take 2 我係咪好失敗呀？Chris 要第三者都唔要我。
513. 尼露 失敗嘅係 Chris，係佢花心！
514. 社工 你點會失敗啫，你朗誦又得、宜家演話劇又得，我聽過好多老師都讚你。雖然失戀係唔開心，但都唔好貶低自己。
515. 尼露 Take 2 校長都有讚！
516. 社工 要多啲欣賞自己嘅優點！要識得自愛！呢條大麻繩，等我同妳揀咗佢啦！
(尼露發現大麻繩鬆脫了。)
517. 旁白 (數白攬) 你地，我地，好鬼醒！搞掂大麻甩條繩！
518. 尼露 呀，條大麻繩鬆咗喇！
519. Dudu 阿丁生命有 Take Two，去片。

(Take 2 的丁在學校小食部。)
520. 同學 A 嫦姐，我哋約咗阿丁喺籃球場食 lunch，宜家走咗嚟小食部……
(丁出現。)
521. 丁 Take 2 你哋有冇搞錯呀？約咗我喺籃球場，自己就嚟咗小食部。
522. 嫦 我哋頭先都有去籃球場架，係嘛？
523. 丁 Take 2 你講大話！頭先我喺籃球場企咗半個鐘，你哋知唔知幾晒呀？
524. 同學 B 幾晒呀？
525. 丁 Take 2 晒到命都有呀！
526. 嫦 咪好囉，難得機會等你晒吓命！想埋我哋堆，慳啲啦！
527. 丁 Take 2 我有乜嘢得罪你哋呀？

528. 丁 停呀!
(所有人定格, 阿丁上前把阿丁 Take 2 拉出來)
529. 丁 Take 2 你拉我出嚟保乜呀?
530. 丁 (搖頭) 我唔想佢哋再蝦你!
531. 丁 Take 2 你有辦法幫我?
532. 丁 我有辦法, 不過暫時避開吓, 透吓氣, 都好丫!
533. 丁 Take 2 話畀老師聽!
534. 丁 我話過畀班主任聽, 班主任話我唔識得同人相處, 叫我反省!
535. 丁 Take 2 話畀媽媽聽!
536. 丁 我唔想咁多人知呀! 我唔想返學, 唔想見到同學……我唔想演呢個戲, 不過我更加唔想留係開心地!
537. 丁 Take 2 除咗班主任, 我哋仲有其他老師呀?
538. 丁 其他老師幫到我哋咩?
(老師出。)
539. 老師 阿嫦, 你知唔知你嘅行為, 會傷害其他同學架?
540. 嫦 我都有打佢。
541. 老師 用惡意嘅說話同態度, 對同學做成嘅傷害會仲大過用手用拳頭呀!
阿嫦, 我已經觀察咗你好耐, 我已經約咗你媽媽傾傾。
542. 眾同學 吓? 唔係呀嘛!
543. 老師 各位同學, 如果你哋真係有唔開心, 一定要搵老師傾, 一位老師幫唔到你哋, 你哋唔使灰心, 要繼續搵另一位, 總會有一位老師會聽你哋講嘢, 幫到你哋! 呢條大麻繩, 等我同妳搵咗佢啦!
(丁的大麻繩鬆脫了。)
544. 旁白 (數白攬) 你地, 我地, 好鬼醒! 搞掂大麻甩條繩!
545. 丁 呀, 條繩鬆咗喇!
546. Lulu 點啊, 阿松、小肥、尼露、阿丁, 大麻繩就鬆咗喇。有乜嘢想同大家講呀?
547. 松 唔好將自己嘅好奇心放嘅毒品上面。
548. 小肥 唔好太過相信自己嘅能力, 以為自己服食毒品之後唔會上癮。
549. 尼露 要小心分辨好朋友同壞朋友, 叫我哋服食毒品嘅, 一定係壞朋友!
550. 丁 有唔開心, 要搵身邊嘅人傾。
551. 松 我哋雖然唔開心, 但係, 原來我哋身邊有好多人關心我哋。
552. 小肥 有爸爸媽媽、學校一班同學、老師, 仲有社工啊!
553. 眾人 濫藥唔單只解決唔到問題, 仲會產生更大嘅問題, 最終不能自拔!
554. 旁白 (數白攬) 各位學生哥, 聽我唱支歌, 人生路上嘅困難一籬籬,
唔好為咗少少苦楚, 麻醉自己辛苦嚟擺,
不受壞人囉囉嗦嗦, 引你吸食危精毒多,
應為少壯不斷努力, 好好做事打好基礎, 追求理想受人讚歌。
555. 眾人 (唱) 歡笑樂園開心地, 開心到日夜笑嘻嘻
喜氣揚眉歡笑面, 我地大家歡聚真有趣
- (白) 濫藥其實好可怕, 我地大家都要說不
不可一亦不可再, 前途自然一片光明
- (唱) 嘻哈……歡欣多喜氣, 聽師長教誨真歡喜, 爸媽的話常念記
這片校園開心地, 開心到日夜笑嘻嘻

喜氣讓你歡笑面，我地大家歡聚真有趣

(白) 咪將唔開心放大，其實只要想多一想
件事就會好唔同，撥開烏雲見青天

(唱) 歡笑樂園開心地，開心直到落腳趾尾
喜上眉頭多快樂，我哋闔家歡樂真有趣

-完-